

芝園外集

芝園外集卷之十四

說林十四

廣訓林

人君之職莫大於用人宰相之職莫大於薦人自古國家危如累卵用賢則興不待瑞鳳祥麟而知之矣安知磐石廢賢則傾不待妖狐厲鬼而知之矣是故有道之世雖妖亦祥無道之世雖祥亦妖占以其人而不以其物者也昔者齊景公出獵上山見虎下山見蛇問晏子曰此不祥耶晏子曰有賢而不知知而不用用而不任此不祥也山者虎

之室澤者蛇之穴何不祥也

翟王使使至楚楚王誇使者以章華之臺高廣美麗無匹也楚王曰翟國亦有此臺乎對曰翟王茅茨不剪綵椽不刻猶以為作之者勞居之者佚楚王大忤石祁子曰甚矣土木之足以亡人國也秦之二世隋之煬帝蓋可鑒也已盡天下之力竭天下之財山林不足於材木文石不足於礎甃金鐵不足於鈎鑿陶冶不足於蓋覆丹青不足於縹繪匠氏不足於雕鏤鞭笞殺戮日驅以從事惟恐其不給也而不知咸陽之燼已伏於阿房之營四方

之兵已聚於離宮之楸曾不得快心極意以娛耳目之好豈不大可哀哉昔堯以上階而帝禹以卑宮而王漢文惜露臺之費而致治幾於成康此萬世君人之法也

齊宣王謂淳于髡曰先生論寡人何好對曰古者所好四而王所好三古者好馬王亦好馬古者好味王亦好味古者好色王亦好色古者好士王獨不好王曰國無士耳若有寡人亦好之對曰驥騮騏驥未有也而王求之豹象之胎未有也而王求之毛嬙西施未有也而王求之夫士者國家之所

急豈惟充其嗜好而已哉逆意其無而不求之是非髡之所知也

進言者審其利國與否而不當以其私聽言者審其利國與否而不當逆其私昔邾之故法為甲裳以帛公息忌謂邾君曰不若以組凡甲之所以為固者以滿絮也今蒙以帛則任力者半而以組則盡任力矣邾君以為然曰將何所得組也公息忌對曰上用之則民為之矣邾君曰善乃下令令官為甲必以組公息忌知說之行也因令其家皆為組人有傷之者曰公息忌之所為用組者其家多

為組也邾君不悅於是復下令令官為甲無以組
夫為甲以組而誠便也公息忌雖多為組何傷也
以組不便公息忌雖無組亦何益也為組與不為
組不足以累公息忌之說用組之心不可不察也
此邾君過於逆進言者之私而公息忌亦無以自
白其無私也

人有言曰河涸則井竭廩罄則釜虛故善為計者
先公而後私不善為計者反之世之人臣皆患其
身不貴於國也而不患其主之不貴也皆患其家
之不富也而不患其國之不大也是以任職則荒

亂臨財則貪得列近則緘默將衆則縮衄以此厚望
於主豈不難哉故曰天下大亂無有安國一國盡
亂無有安家一家皆亂無有安身是以欲榮而終
辱欲安而終危譬之大厦既覆而身無所庇皮革
既毀而毛無攸附也向之網利竊權之徒果何益
哉吳之宰嚭秦之李斯為鑒不遠矣

趙襄子伐翟勝左人中人

二城名

使使者來謁之襄

子方食搏飯有憂色左右曰一朝而兩城下此人
之所喜也今君有憂色何襄子曰江河之大也不
過三日飄風暴雨日中不須臾今趙氏之德行無

所於積一朝而兩城下亡其及我乎孔子聞之曰
趙氏其昌乎夫憂所以為昌也而喜所以為亡也
勝非其難者也持之其難者也賢主以此持勝故
其福及後世齊荆吳越皆嘗勝矣而卒取亡不達
乎持勝也是故有道之士位高則憂祿厚則憂權
重則憂家富則憂此所以持之也不修其德而驕
淫以逞鮮不敗矣

齊桓公見小臣稷一日三至弗得見從者曰萬乘
之主見布衣之士一日三至而弗得見未可以止
乎桓公曰不然士傲祿爵者固輕其主其主傲霸

王者亦輕其士縱夫子傲祿爵吾庸敢傲霸王乎
遂見之不可止君子謂桓公能為國矣內行雖不
修霸不亦宜乎是故王能下士則王霸能下士則
霸公卿能下士則德業聞於天下若佞倖是親姻
姬列於牕仕比周競進國之亡無日矣又何治安
之足圖哉

夫純釣魚腸之始下型也擊則不能斷刺則不能
入及加之砥礪利其鋒鏑則水斷蛟龍而陸割犀
象不難也明鏡之始下型也矇然未見形容也及
粉以玄錫摩以白旃鬚眉毛髮可得而察也玉堅

無敵鏤以為獸首尾成形磬礪之功也木直中繩
揉以為輪其曲中規槩括之力也夫人心之虛靈
非若唐碧直木也非若銅鐵之堅厲也彼以磨礪
槩揉皆足以成器而況於人乎是故君子博文以
廣識約禮以修行去其偏駁全其神明則可以治
人可以宰物可以贊化育可以參天地而天下之
能事畢矣

或曰今天下弊矣隣里相盜親戚相暴父子兄弟
不相恤也亦何道以拯之石祁子曰古有言倉廩
實而後知禮節衣食足而後知榮辱故救弊之道

亦在富之而已矣方河決而陸沉也父子兄弟相
遺而走爭升陵阪上高丘輕足先升不能相顧也
世樂志平見隣國之人溺則哀而援之矣况親戚
乎故身安則恩及隣國身危則忘其親戚非其性
之有變也所遭則然也故游者不能拯溺手足有
所急也灼者不能救火身體有所痛也故欲民之
興行亦在富之而已

趙襄子以任登為中牟令上計言於襄子曰中牟
有士曰臽胥已請見之襄子見而以為中大夫相
國曰意者君耳而未之目耶為中大夫若此其

也。邾晉國之故。襄子曰。吾舉登也已耳。而目之矣。
登所舉。吾又耳。而目之。是耳目人終無已也。遂不
復問。而以為中大夫。君子曰。趙襄子其善任人矣。
語曰。疑人勿用。用人勿疑。故治宮室者。擇大匠。大
匠之所舉。為匠氏者。其主弗與也。合燕享者。擇大
庖。大庖之所舉。為庖人者。其主弗與也。既擇所任。
而又擇任者之所舉。不亦勞乎。

有司請事於齊桓公。桓公曰。以告仲父。有司又請。
公曰。告仲父。若是者。三習者。曰。一則仲父。二則仲
父。易哉。為君。桓公曰。吾未得仲父。則難。已得仲父之

後曷為其不易也人有言明主勞於求賢而逸於得人二帝三王莫不由此道也何獨桓公為然哉是故百畝之田而委之農師百圳之園而委之園師非忘樹藝也無所自用其力也然則無逸之訓非與曰任人而逸為治之要也所其無逸儆畏之心也不得其人而逸國之亡無日矣

為天下國家者莫大乎男女之別男女者君臣之所由以義父子之所由以親者也國之所由以治所由以亂者也是故文王化行而游女變為喬木孔子為魯司寇而男女別於途公慎氏出其妻凡

天下之民莫非君之子也父母之於子也莫不願其貞莫不戒其非貞以為不如是無以別於禽獸也墻茨之戒鴝奔之譏豈其不嚴於訓乎後之有國者私姦之禁非不設也乃謫民為倡而編之樂籍領之伶官使之為市以取貨人其衣裳而犬羊其溷也此豈為民父母之道哉至有名臣節士亦縱情於聲妓之場其視禮義之坊猶之弁毛上梗也先王九伐之法而行也茲其不為首僂乎誠能罷免倡樂驅而為良則人道以立而教化可興矣尹鐸為晉陽請事於簡子簡子曰往而夷夫壘我

將往往而見壘是見中行寅與范吉射也鐸往往而
增之簡子之晉陽望見壘而怒曰嘻鐸也欺我於
是乃舍於郊將使人誅鐸也孫明進諫曰以臣私
之鐸可賞也鐸之言固曰見樂則淫侈見憂則諱
治此人之道也今君見壘念憂患而况群臣與民
乎夫便國而利於上雖無於罪鐸為之夫順令以
取容者衆能之而况鐸與君其圖之簡子曰微子
之言寡人幾過矣於是乃以免難之賞賞尹鐸君
子謂趙有三善矣尹鐸存憂虞之戒以悟君忠也
孫明表諷諫之旨以釋怒直也簡子善便國之圖

以行賞明也有此三者趙之強不亦宜乎

君者萬民之長虎若百獸之長虎之所以能服狗者爪牙也虎釋其爪牙而使狗用之則虎反服於狗矣人主者以刑德制臣者也君人釋其刑德而使臣用之則君反制於臣矣故田常上請爵祿而行之群臣下大斗斛而施於百姓此簡公失德而終於見弑子罕謂宋君曰失慶賞賜予者民之所喜也君自行之殺戮刑罰者民之所惡也臣請當之於是宋君失刑而至於見刼田常徒用德而簡公弑子罕徒用刑而宋君刼如為人臣者無刑德

而用之則是世主之危甚於簡公宋君也大亂將
作位稷將傾豈特刼殺之禍而已哉

獵者愛狗豢以肥肉非不惜肉也為其可以得獸
也御者愛馬飼以美粟非不惜粟也為其可以致
遠也惟人亦然醫者吮人之傷含人之血非臭惡
之甘也為其可以取貨也將者撫循其軍救死扶
傷視如嬰兒非骨肉之親也為其可以克敵也惟
士亦然解衣衣之推食哺之甚者適館而饗過問
而式甚者號為太公稱為仲父以君王之貴而詘
於匹夫之賤豈其不知自重哉為其可以謀王斷

國而成不世之功也如草芥視之而欲大其國
也是瘠其狗而使之獵餒其馬而使之馳也欲以
得志不亦難乎

小人之害君子也非直肆其凶暴也竄端匿跡左
私於公倚邪於正而以眩惑人之心者也諛言似
順佞色似和遜美似譙然諾似信日漸月漬而不
知其入人之深也毒惡既成以時致螫比君子之
覺之也已墮其術中矣欲無及於禍得乎今夫
狐之捕雉也必先卑體弭耳以待其來也雉見而
信之一奮即成擒矣使狐瞋目張喙先見必殺之

勢雉必驚憚遠飛以避其怒矣夫人偽之相欺也非直禽獸之詐計也而可不慎乎

趙簡子出而御車見車席泰美謂左右曰夫冠雖敝頭必戴之屨雖新足必履之今車席泰美吾將何僑以履之夫美下而耗上妨義之本也石祁子曰簡子可謂善為國矣夫儉德之共也奢惡之大也是故茅茨上階堯之所以聖也瓊宮瑤臺紂之所以亡也漢文帝以綈衣後宮宋仁宗以漆為唾壺此皆盛德之主也

西門豹為鄴令清潔無私利也而甚簡左右左右

因相與比周而惡之居期年上計君叔其璽豹自請曰臣昔者不知所以治鄴今臣得矣願請璽復以治鄴不當請伏斧鑕之罪文侯不忍而復與之豹因重歛百姓急事左右期年上計文侯迎而拜之豹對曰往年臣為君治鄴而君奪臣璽今臣為左右治鄴而君拜臣臣不治矣遂納璽而去文侯不受曰寡人曩不知子今知矣願子勉為寡人治之遂不受嗟乎今之守官者皆為左右治而不為其君治也雖有西門豹之言亦何以自通於殿陛乎

齊桓公微服而行於民間有鹿門稷者行年七十而無妻桓公問管仲曰若鹿門稷者何以令之有妻管仲曰臣聞之上有積財則臣民必匱乏於下宮中有怨女則有老而無妻者桓公曰善令於宮中女子未嘗御者出嫁之乃令男子年二十而室女年十五而嫁則內無怨女外無曠夫石祁子曰君制命者也民寄命於君者也生則生之殺則殺之安則安之困則困之故君節其衣則天下無寒民矣君節其食則天下無餓民矣婚姻以時則天下無鰥曠者矣區區宮女之出亦何為乎

國有四患外有疑相之臣臣有疑君之權內有疑妻之妾妾有疑嫡之子此四者國之所以危也秦之李斯漢之王莽此疑君之相也殷之崇侯虎秦之趙高此疑相之臣也周之褒姒晉之驪姬此疑妻之妾也周之伯服晉之奚齊卓子此疑嫡之子也此數君者不幸則國亡幸則國亂故曰並后匹嫡兩政偶國亂之本也

家國一也治家與治國一道也家人之治產也相忍以飢寒相強以勞苦雖犯軍旅之難飢饉之患而溫衣美食者必是家也相驕以衣食相惠以佚

樂天飢歲荒嫁妻賣子者必是家也是故君臣殷
憂邦未有不興者也君臣淫縱邦未有不喪者也
是故酒池肉林可以亡殷卧薪嘗膽可以霸越桓
公無忘射鉤之難而興齊二世極意阿房之樂而
滅秦徽宗逞欲於艮嶽之營身為奴虜南渡君臣
縱情於燕安之毒社稷為墟豈非萬世之炯鑒乎
人之所患乎人者有三上焉者患人以人其次患人
以言其次患人以事小人則貨財而已矣故得十良
馬不若得一伯樂非馬之不足貴也伯樂得而馬不
可勝用矣得十良劍不若得一歐冶非劍之不足寶

也歐治得而劍不可勝用矣得地千里不若得一賢
聖之人非地之不足重也賢聖之人得而地不可勝
治矣是故湯不求廣地而求得伊尹文王不求廣地
而求得呂望此其所以興也秦政不求得人而求代
周項籍不求得人而求代秦此其所以廢也

十里之間而耳不能聞惟牆之外而目不能見三
畝之室而心不能知治天下者東至開梧南撫多
顓西服壽靡北懷僭耳而欲以一人之耳目心智
周之不亦難乎故以天下之目視則明無弗見矣
以天下之耳聽則聰無弗聞矣以天下之心知則

智無弗達矣昔聖王之治天下也大桡作甲子黔
如作虜首容成作曆羲和作占日尚儀作占月后
益作占歲胡曹作衣夷羿作弓祝融作市儀狄作
酒高允作室虞姁作舟伯益作井炎冀作臼秉雅
作駕寒衰作御王冰作服牛史皇作圖臣彭作醫
臣咸作筮此二十官者聖王之所以治天下也聖
王不能二十官之事然而使二十官盡其巧畢其
能聖王在上故也聖王之所不能也所以能之也
所不知也所以知之也養其神修其德而化矣豈
必勞形神而弊耳目哉

魯哀公欲西益宅史爭之以為西益宅不祥哀公作色而怒左右數諫不聽乃以問其傅宰折睢曰吾欲益宅而史以為不祥子以為何如宰折睢曰天下有三不祥而西益宅不與焉哀公大悅頃復問曰何謂三不祥對曰不行禮義一不祥也嗜欲無止二不祥也不聽強諫三不祥也哀公默然深忿憤然自反遂不西益宅是故臣有諫之而不諫有不諫而諫者君有聽之而不聽有不聽而聽者此聖人所以貴遇主於巷也

田贊衣補衣而見荆王荆王曰先生之衣何其惡

也田贊對曰衣又有惡於此者也夫甲冬日則寒
夏日則熱衣無惡於此者也贊也貧故衣惡也今
太王萬乘之主也富貴無敵而好衣人以甲臣弗
知也石祁子曰夫君民之父母也父母之於子也
食患其弗適於口也衣患其弗適於體也故民有
飢者君為之不舉民有寒者君弗敢藻其服樹桑
畜牝凡以子之也今夫內治之不修德威之不競
不能衣人以衣而惟衣人以甲也惡在其為民父
母哉

人之將病也不嗜食國之將亡也不嗜賢病非無

甘旨也胃不能納而至於死國非無賢人也君不
能用而速其亡理亂當得忠貞反得奸佞而用之
亂乃滋甚非賢無益也治病當得良藥反得繆劑
而服之病乃增劇非藥無効也殷之將亡也而崇
侯虎速之秦之將亡也而李斯速之漢之將亡也
而董卓速之晉之將亡也而桓溫速之隋之將亡
也而麻叔謀段達速之唐之將亡也而李訓鄭注
速之宋之將亡也而賈似道韓侂胄速之此皆繆
於用藥之禍也

魏文侯見段干木立倦而不敢息反見翟璜踞於

堂而與之言翟璜不悅文侯曰段干木官之則不肯祿之則不受今汝欲官則相位欲祿則上卿既受吾實又責吾禮無乃難乎人有言曰犬豕可豢而神龍不可豢神龍不食於人故也鷄鶩可籠而鳴鷄不可籠鷄鶩食於人故也故食於人則為翟璜不食於人則為段干木有欲與無欲故耳世有二佞諛以投餌結宦寺以掩慝賄女謁以伺私甘譴辱以固佐吮癰舐痔猶且為之而欲主之無誣惡可得乎

晉太史屠黍見晉之亂也以其圖法歸周周威公

見而問焉曰天下之國孰先亡對曰晉先亡臣比
在晉也不敢直言示晉公以天妖日月星辰之行
多不當曰是何能為又示以人事多不義百姓皆
鬱然曰是何能傷又示以隣國不服賢良不舉曰
是何能害如是是知所以亡也故臣曰晉先亡
也居三年而晉果亡威公又見屠黍而問曰孰次
之對曰中山次之夫天生民而令有別人之所異
於禽獸麋鹿也君臣上下之所以立也中山之俗
以晝為夜以夜繼日男女切倚固無休息康樂歌
謠好悲其主弗知惡此亡國之風也臣故曰中山

次之居二年中山果亡威公又見屠黍而問焉曰孰次之屠黍不對威公固問對曰君次之威公乃懼求國之長者得義時田邑而禮之得史麟趙駢以為諫臣去苛令三十九物以告屠黍對曰其尚終君之身乎臣聞之國之興也天遺之賢人與極言之士國之亡也天遺之亂人與善諛之士威公薨而周分為二是故有禮則安無禮則危用賢則興不用賢則亡國之常數也

趙簡子朝而謂群臣曰厥也愛我鐸也不愛我厥之諫我也必於無人之所鐸之諫我也喜質我於

人甲必使我醜尹鐸對曰厥也不忍君之醜也而
忍君之過也鐸也不忍君之過也而忍君之醜也
臣嘗聞相人於師敦頤而土色者忍醜不質君於
人中恐君之不變也君子謂簡子誠賢主矣主賢
則臣言刻主不賢則臣言甘刻則不便於一人而
便於國家甘則不便於國家而便於一人故欲國
家之理亂觀於進言之甘苦而可知也

庖人作美饌以享賓客賓客之樂之也謝主人而
不謝庖人匠氏作美室以宅家衆隣里之觀之也
譽主人而不譽匠氏故善為天下國家者以人臣

之善為善天下後世不歸美於人臣而歸美於其
主明君哲辟由此其選也昔衛靈公天寒鑿池宛
春諫曰天寒起役將無傷民乎公曰天寒乎宛春
曰公衣狐裘坐熊席陬隅有竈是以不寒今民衣
弊不補履決不組君則不寒民則寒矣公曰善令
罷役左右諫曰君鑿池不知天之寒也而春也知
之以春之知之也而令罷之福將歸於春也而怨
將歸於君公曰不然夫春也魯國之匹夫也而我
舉之夫民未有見焉今將以此見之曰春也有善
於寡人也春之善非寡人之善與君子謂靈公可

謂知君道矣君也者無任而無不任者也無能而無不能者也故鏡其美惡行其賞罰而已矣何必自用其智自私其善而可以有譽於天下後世乎

桓公將飲管仲掘新井而柴焉十日齋戒而召之管仲至公執爵夫人執尊觴三行管仲趨出公怒鮑叔隰朋追之及管仲於途而返之公曰寡人齋戒十日而飲仲父自以為脫於罪矣仲父不告寡人而出未知其故也對曰聞之沉於樂者治於憂厚於味者薄於行慢於朝者緩於政荒於國家者危於社稷臣是以出也公遽下堂曰寡人非敢自

為樂也仲父年長寡人亦衰矣吾願一朝安仲父也對曰臣聞壯者無怠老者無偷順天之道必以善終者也三王之後失之非一朝之萃君柰何其偷乎管仲出公以賓客之禮送之景公之時霖雨十有七日公飲酒日夜相繼命柏遽巡國致能歌者晏子徒行見公曰百姓老弱凍寒不得裋褐飢餓不得糟糠四顧無告而君不恤日夜飲酒致樂不已民無樂有君矣嬰之罪大矣再拜稽首請身而去公驅而及之康內曰寡人有罪夫子倍棄寡人不足以有約也夫子不顧社稷百姓乎願夫子

之幸存寡人也晏子乃返命稟巡氓家差其貧富而給之布縷粟米薪燎公出舍損肉撤酒馬不食肝肉吏告畢公然後就內退食琴瑟不張鐘鼓不陳君子曰管仲晏子可謂不從君於昏矣明主懷百年之憂而忘一日之樂昏主耽一日之樂而忘百年之憂比干之諫不容於紂而二子之諫見聽於君遇使然也

為國者莫患乎有壅救弊者莫先於去壅是故百廛之市不畜噓犬八家之井不畜觝牛以有壅也善賈者不壅其貨善田者不壅其禾善養生者不

壅其氣善導水者不壅其泉至於為治而可以壅其賢乎是故去讒遠色明目達聰衢室之間總章之咨一饋十起一沐三握皆所以防壅也彼周王之使監謗者鄭人之欲毀鄉校是惡其壅而窒之也庸將愈乎

作器者無良材而有良匠治國者無能臣而有能君有材而無匠猶無材也有臣而無君猶無臣也是故舜非堯無以敘百揆禹非堯無以定九州傳說非高宗無以成中興周公非成王無以興禮樂蕭曹非高祖無以興漢房杜非太宗無以興唐此

已事之明徵也然則有君而無臣則如之何曰古
之為治者未始借才於異代臣之不得猶夫無君
也是故勝者所用敗者之基也與國所用亡國之
臣也

君子之取於世也常薄而其積於身也常厚故一
藝足以成名然而衆藝無焉一長足以媒仕然而
衆長無焉是故在家則治在官則治在邊鄙則治
在朝廷則治在軍旅則治在俎豆則治可大可小
可遠可近可崇可卑可簡可繁以其為之者素也
小人則不然得此而遺彼舉一而廢百以其為之

者不素也今夫羅之張也以待鳥也而得鳥者羅之一目也若為一目之羅則無時得鳥矣甲之被也以備矢也而中矢者甲之一札也若為一札之甲則無時不傷矢矣是故君子之處世也以有備勝無備以有餘待不足

仕之患有三而疾病不與焉榮孽卿之祿嗅驕君之餌此一患也佞諛以苟容比周以固位此一患也干戈生於談笑陷阱設於盤庖此一患也昔太宰子朱侍飯於令尹子國令尹子國啜羹而執投卮漿而沃之明日太宰子朱辭官而歸其僕曰楚

太宰未易得也辭官而去之何易也子朱曰令尹
輒行而簡禮其辱人不難矣明年伏郎尹而笞之
三百世之人主往往以爵祿驕其臣少不適則呵
怒之無已則謫譴之無已則戮辱之刀鋸在前而
猶不知所以自靖也欲無及得乎

君人者利人則天下歸之虐人則天下畔之故撫
我則后虐我則讎后與讎無定主而撫與虐有常
應也今夫賣庸而播耕者主人費家而美食調布
易錢以資之非愛庸客也欲其力耕而豐殖也庸
客致力而疾耕盡巧而正畦陌者非愛主人也欲

其美食而資錢布也家之有嬰兒也父母養之而簡長而相怨供養薄於父母父母怒而誚之子父至親也而或誚或怨者以所以養之非其養也是故人君利人則為主庸之相養人君厲人則為父子之相棄

趙簡子沉鸞徼於河左右請其罪簡子曰吾嘗好聲色矣而鸞徼致之吾嘗好宮室臺榭矣而鸞徼為之吾嘗好良馬善御矣而鸞徼來之今吾好士六年矣而鸞徼未嘗進一人也是長吾過而詘善也是以誅之君子謂簡子能以理督責於其臣矣

夫君表也而臣則其影也君範也而臣則其器也
直木無曲影欹範無端器理之恒也故君好聲則
師曠子野至君好色則毛嬙曼姬至君好宮室臺
榭則公輸王爾至君好良馬則黃式盜驪至君好
善御則王良造父至君好士則伊傅周召至惟以
理督責於其臣則人主可與為善而不可與為非
可與為直而不可與為枉此二帝三王之所以成
盛治也

芝園外集卷之十五

說林十五

物理林

天道曰負地道曰方方者主幽負者主明明者吐
氣者也是故火曰外景幽者含氣者也是故水曰
內景吐氣者施含氣者化是故陽施陰化天之偏
氣怒者爲風地之含氣和者爲雨陰陽相薄感而
爲雷激而爲霆亂而爲霧陽氣勝則散而爲雨露
陰氣勝則凝而爲霜雪毛羽者飛行之類也故雉
於陽介鱗者蟄伏之類也故屬於陰日者陽之主

也是故春夏則群獸除日至而麋鹿解月者陰之
宗也是以月虛而魚腦減月死而羸蛇焦火上燭
水下流故鳥飛而高魚動而下物類相動本標相
應故陽燧見日則燃而爲火方諸見月則津而爲
水虎嘯而谷風至龍舉而景雲屬麒麟鬪而日月
食鯨魚死而慧星出蠶珥絲而商弦絕賁星隊而
渤海決人主之情上通於天故誅暴則多飄風枉
法令則多蟲螟殺不辜則國赤地令不收則多淫
雨

凡地形東西爲緯南北爲經山爲積德川爲積

高者爲生下者爲死丘陵爲牡谿谷爲牝水負折
者有珠方折者有玉清水有黃金龍淵有玉英土
地各以其類生是故山氣多男澤氣多女障氣多
暗嵐氣多龍蟠林氣多樛木氣多僂岸下氣多腫石
氣多力險阻氣多癭暑氣多天寒氣多壽谷氣多
痺丘氣多狂衍氣多仁陵氣多貪輕土多利重土
多遲清水音小濁水音大湍水人輕遲水人重中
土多聖人堅土人剛弱土人肥壩土人大沙土人
細息土人美耗土人醜食水者善游耐寒食土者
無心而慧食木者多力而曩食草者善走而愚食

葉者有絲而蛾食肉者勇敢而悍食氣者神明而
壽食穀者智慧而夭不食者不死而神凡人民禽
獸萬物貞蟲各有以生或竒或偶或飛或走莫知
其精惟通道者能原本之

六合孟春與孟秋爲合仲春與中秋爲合季春與
季秋爲合孟夏與孟冬爲合仲夏與仲冬爲合季
夏與季冬爲合孟春始嬴孟冬始縮仲春始出仲
秋始內季春大出季秋大內孟夏始緩孟冬始急
仲夏至修仲冬至短季夏德畢季冬刑畢故正月
失政七月涼風不至二月失政八月雷不藏三月

失政九月霜不降四月失政十月不凍五月失
十一月蟄蟲冬出其鄉六月失政十二月草木不
脫七月失政正月大寒不解八月失政二月雷不
發九月失政三月春風不濟十月失政四月草木
不賓十一月失政五月下霜霜十二月失政六月
五穀疾狂春行夏令泄行秋令水行冬令肅夏行
春令風行秋令蕪行冬令格秋行夏令華行春令
榮行冬令耗冬行春令泄行夏令旱行秋令霧
山之雲也爲草莽水之雲也爲魚鱗旱之雲也爲
烟火涔之雲也爲波水此言物類之各有所感也

三
歲欲豐而甘草先生穡是也歲欲苦而苦草先生
意蘆是也歲欲惡而惡草先生水藻是也歲欲旱
而旱草先生蒺藜是也歲欲雨而雨草先生藕是
也歲欲病而病草先生艾是也歲欲流而流草先
生蓬是也此言物理之各有所兆也石瀆子曰天
之休咎也善惡恒以類徵世之否泰也灾祥必有
先見觀於此而可知也

蛇化雉雉化蜃鱗化蛟蟻化駒魚化龍龍化魚鼠
化鴛鴦化鼠龍化蛇蛇化龍雀化蛤蠹化蝶鳩化
鷹鷹化鳩此以形類化者也絮化萍苓化龜橘

化杏莧化鱉樹化牛稻化蚕蔬化蝶腐菌化
蜂腐草化螢濕麥化蛾朽木化蟬此以氣類化者
也狐化男雌化雄螯化龜星化肉慧化胡青化人
雨化血地化毛此以災異化者也杖化龍舄化鳧
人化羊星化豕井化酒儿化麕祀化犬米化丹墨
化雨此以妖術化者也形類也氣類也災異也天
爲之也妖術則人也天之化常有而人之化不常
有天之化十八九而人之化十一二或曰聖人何
以不化曰詩書禮樂典章刑政莫非化也聖人之
化神於道而術士之化神於妖

鴉鳩性一而慈祝鳩性一而孝烏得食而反哺鷦
見食而呼群鷽虞不殺麒麟好生此物之有仁者
也鷹能觸邪鷹不擊伏鶻縱煖爪之禽隼釋懷胎
之鳥鴛鴦思偶而死獫狁類而斃此物之有義者
也豺祭獸獺祭魚蜂蟻必宗其君睢鳩不亂其匹
羔飲乳而必跪其母雉鳴鵠而必推其雄此物之
有禮者也狼卜食向虎奮衝破蛇蟠向壬鵲巢面
歲燕伏戊巳蝠忌庚申獬自斷其尾麝自決其臍
群鹿環角而外衛羴羊懸角而木棲鴛盡印而開
穴鷦禹步而發蛇雁設奴而警察鷺偃絲而啄蟲

蟬則隱巢而捕蟬蚋蛛布網而籠蟲蚱蜢禁蛇外
蟻轉九溪驚勅邪蜈蚣祝子狐聽水鷓知雨此物
之有智者也玄鳥以春分來秋分去丹鳥以立秋
來立春去伯趙以夏至鳴冬至止青鳥以立春鳴
立夏止此物之有信者也

大騄歸之山有草曰狼狼服之不夭放臯之山有

木曰蒙木服之不惑苦山有草曰無條服之不癯

牛首之山有草曰鬼草服之不憂翼望之山有獸

曰謹服之已瘳服帶其毛尾也青丘之山有鳥曰灌灌佩

之不惑佩亦服也基山有獸曰獬廌博施佩之不畏

憲異之水有龜曰旋龜佩之不聾扭陽之山有獸

曰鹿蜀佩之宜子孫招搖之山有木曰迷谷佩之

不迷錢來之山有獸曰羝羊可以已腊皴也松果之

山有鳥曰鵽形渠可以已曝皴皮也甘棗之山有草

曰擇可以已膏有獸曰難那可以已癭脫扈之山

有草曰植楮可以已瘋霍山有獸曰肫肫普昧反

以已憂招搖之山有草曰祝餘食之不饑上由

山有鳥曰當扈食之不眩陵陽之澤有魚曰

食之不昧帶山有鳥曰鵽鵽食之不疽吟水

曰鵽窈食之宜子小隱之山有草曰蒹草人

忘其脆之山有草曰條食之已芥皐塗之山有鳥
曰數斯食之已痾陽山有獸曰領胡食之已狂英
山有鳥曰肥遺食之已癘諸毗之水有魚曰滑魚
食之已疣天帝之山有鳥曰櫟食之已痔崑崙之
丘有草曰蕢草食之已勞譙水有魚曰何羅食之
已癰蔓聯之山有鳥曰鷓食之已風單張之山有
鳥曰白鵠夜食之已嗌痛比囂之山有鳥曰鶩般
鷓冒食之已暘陽華之山有草曰諸蕒食之已瘥
此皆物之有利於人者也蟠冢之山有草曰葍蓉
食之無子雁門之水有魚曰鮐鮐沛食之殺人鈎

吾之山有獸曰狍。狍能食人。鹿吳之山有獸曰
蟲。蟲能食人。萊山有鳥曰羅羅。羅能食人。邽山有獸
曰窮奇。窮奇能食人。此皆物之爲厲於人者也。

空桑之山有獸曰軫。軫見則天下大水。崇吾之山
有鳥曰蠻蠻。蠻見則天下大水。敖岸之山有獸曰天
諸。諸見則其邑大水。玉山有鳥曰胜。胜姓遇見則其國
大水。崦嵫之山有鳥曰自號。自號見則其邑大水。渾夕
之山有蛇曰肥遺。肥遺見則其國大旱。姑逢之山有鳥
曰徹徹。徹見則天下大旱。令丘之山有鳥曰顓頊。
顓頊見則天下大旱。蛇山有獸曰他巴。他巴見則有兵。鹿

鑿之山有鳥曰鳬鵲見則有兵歷石之山有獸曰
梁渠見則大兵小次之山有獸曰朱厭見則大兵
礪山有鳥曰絜鉤見則其國多疫火山有獸曰蜚
見則天下大疫復州之山有鳥曰鼓鍾見則其國
大疫樂馬之山有獸曰狻見則其國大疫拒山有
獸曰狴刀見則邑多土功盧山有鳥曰鷖
鵠見則國多土功獄法之山有獸曰山獬見則
天下大風凡山有獸曰聞鱗見則天下大風耿
山有獸曰朱孺見則其國有恐景山有鳥曰酸
與見則其邑有恐餘哉之山有獸曰狴余見

則螽蝗爲敗堯光之山有獸曰猾褢懷見則縣有大狸章義之山有鳥曰畢方見則邑有譌火柅山有鳥曰鵠見則縣多放士硯山有獸曰猓猓攸見則國多狡客此皆物之兆灾者也丹穴之山有鳥曰鳳凰見則天下安寧女牀之山有鳥曰鸞見則天下安寧欽山有獸曰當康見則天下大穰秦器之水有魚曰文鯨見則天下大穰玉山有獸曰狡見則其國大穰此皆物之兆祥者也

泰豆氏授御於造父先教之趣造父學之三日盡其巧泰豆嘆曰子之敏若是哉凡御亦如此也曩

汝之行得之於足應之於心推於御也齊輯乎轡
銜之際而急緩乎唇吻之和正度乎胃臆之中而
執節乎掌握之間內得於中心而外合於馬志是
故能進退履繩而旋曲中規矩取道致遠而氣力
有餘誠得其術也得之於銜應之於轡得之於轡
應之於手得之於手應之於心則不以目覩不以
策驅心閑體正六轡不亂而二十四蹄所投無差
廻旋進退莫不中節然後輿輪之外可使無餘轍
馬蹄之外可使無餘地未嘗覺山谷之嶮原隰之
夷視之一也於乎馬異類也民同類也順馬之性

以御馬則天下無疲馬矣順民之性以御民則天下無疲民矣

石濟子曰甚哉似是之足以惑人也西方有獸名曰騶虞其性好生出則天下偃兵人以其文之似虎也而遂以爲真虎也南方有鳥名曰昭明其性好亂出則天下交兵人以其羽之類鳳也而遂以爲真鳳也故王莽之謙恭似周公矣而終以居攝篡漢安石之經術師孔子矣而終以新法禍宋

石濟子寢而夢有人謂之曰子知夫蟻蠓乎忽然而起忽然而滅忽然而聚忽然而散視之甚從矣

人之起也滅也聚也散也亦猶是也蟻蝶其細者
不見夫傀儡乎忽然而出忽然而入忽然而喜忽
然而悲視之甚促矣人之出也入也喜也悲也亦
猶是也傀儡其細者不見夫流潦乎忽然而來忽
然而往忽然而盈忽然而涸視之甚促矣人之來
也往也盈也涸也亦猶是也流潦其細者不見夫
日月乎忽然而升忽然而沉忽然而明忽然而晦
視之甚促矣人之升也沉也明也晦也亦猶是也
石瀆子覺而悟曰善哉喻乎吾之有身也陰陽之
氣也忽然聚而爲人久且將復還諸天地非吾有

矣而况禄位名利身外之物乃欲固守而有之不
亦惑乎昔石户之農入海而讓天下王子搜逃丹
穴而讓國顏闔避魯君之徵屠羊說卻楚王之賞
蓋皆不以身殉富貴者也

海上有魚名曰烏鰂謂烏之喜於啄腐也浮而出
之於波鳥果以爲腐也而啄之乃以鬚搗烏足拽
而沉之飽其肺肝焉故又曰烏賊見漁舟至即吐
墨溷水以自蔽漁見其溷也以爲有魚也而捕之
蔑弗得矣夫此一微物也詐足以賊物而不足以

衛身惜哉

雀性好淫名飲器爲爵所以爲飲戒也鳩食多
刻老人杖爲鳩所以爲食戒也鵲行不良借其字
爲舄履之舄所以爲行戒也鷩性耿介畫其形於
衣所以爲節訓也飾鼎以饗饗貪之戒也飾簠簋
以龜庶之勸也

飾羊以爲虎其皮則虎也而其性則羊也接梅以
爲桃其實則桃也而其味則梅也是故色厲者不
免於內在而論薦者未必爲君子

函牛之鼎不可以烹鷄萬石之鐘不可以合舞註
之良也析之而司爨則不如赤棘矣蘭之香也刈

之而飼牛則不如生芻矣明鏡便於照形其於以
函食也不如簞犧牛宜於廟牲其於以致雨也不
若黑螾

魚懷珠而鱗紫鹿戴玉而角斑含其美以自澤也
蓬依麻而自直鳶附木而升高取諸物以自輔也
君子與小人處則小人勝而君子不勝一善噬而
一不善噬也小人與小人處則必比而不相害非
其性之忘噬也各忌其爪牙毒螫而不敢發也故
蟾蜍食螂蛆螂蛆食蛇蛇食蟾蜍三物相值莫敢
先動是亦騎虎之義不得下也

新鬼大而舊鬼小僖閔之所以遂祀也外蛇勝而
內蛇傷突忽之所以相殘也射豕見妖而傷股以
斃戮彭生之殃也夢厲訊巫而卒不食新臧同括
之崇也夢人叫天而被弑已氏殺渾良夫之應也
進食吞蛭而宿疾得愈活宰夫之報也夢蘭而得
君福之徵也夢牛而滅嗣禍之兆也

或謂至信之威豚魚德政之格猛虎馴雉之異弭
蝗之祥其事若茫昧然者而君子亟稱之何也曰
是何足異乎其尤有異者則信陵君之僂鷄童恢
之誅虎是也信陵君方食有鷄逐鳩鳩逃案下鷄

去而鳩出鷄逐殺之信陵君暮爲不食曰鳩避患
歸無忌竟爲鷄所得吾負之捕得鷄者無忌無所
愛於是左右宣聲捕得鷄三百以奉信陵君恐傷
及無辜也乃案劍而問曰誰獲罪無忌者一鷄獨
低頭不敢仰視乃取殺之而盡放其餘名聲布天
下後漢童恢爲不其令民嘗爲虎所害乃設檻捕
之生獲二虎恢出而祝虎曰天生萬物人爲貴虎
狼當食六畜而殘暴於人王法殺人者死傷人則
論法汝若殺人當垂頭服罪否者號呼稱冤一虎
低頭閉目狀如震懼遂殺之其一向恢鳴乳咆蹶

自奮即令放釋由此觀之孰謂鳥獸之不可格哉
是故伯趙禽之至微者也而技人能擾之以鬼弄
虺蜺虫之至微者也而眩人能教之以行陣趨趨
之猛厲也而獵人能馴之以角觝之戲王孫之詭
秘也而弋人能導之以桑林之舞其於小技則然
而况德政之感通又何恠也

驊騮騶駼一日而至千里然其使之搏兔不如豺
狼伎能殊也鳴夜撮蚤蚊察分秋毫晝日顛越不
能見丘山形性詭也騰蛇游霧而動應龍乘雲而
舉援得木而捷魚得水而驚此勢之各有所借也

攻金者不能治石塼埴者不能鑄鐘漆者不畫鑿者不斷此業之各有所專也

崑崙上薄穹窿下蟠厚地妖少恠木之所蕃陰雲夏雪之所積仙靈蟄藏而寶藏興發跂行喙息翹肖蠕動之類不可殫而記也滄海之波瀾洞浩漾黃流浴日怒沫春天萬川不能增其尋丈尾閭不能洩其一勺非不破舟殺物也而蛟龍鼃鼃之屬蟻聚而螽息焉以其有所隱也澧水之深千仞而不受塵垢投金鐵鍼焉則形見於外非不深且清也魚鱉龍蛇莫之肯歸也是故石田不生五穀

山不游麋鹿以其無所隱也

螺蟲之衆也而不能無蛇虺毛蟲之衆也而不能無虎豹此天地之含氣也然置蛇虺於藪澤置虎豹於山林此天地之義氣也今夫小人之生亦物之蛇虺虎豹也顧所以置之何如耳若寵之以祿秋委之以要津是以虎豹蛇虺而置之於通衢也能無啗而螫乎

烏謂鵲曰吾與若形色同也飲啄同也巢居同也子之所之人無不喜而吾之所之人無不惡其故何也鵲曰亦惡子之聲耳夫好祥而懼灾人之情

也吾之鳴也率多兆吉而子之鳴也率多兆凶是以惡子如欲免焉盍時其吉而鳴之乎烏如教而往又復見逐投之瓦甌幾折翼焉烏返而怨鵲也曰甚矣子之誑予也鵲曰何誑烏語之狀鵲曰子謬矣子之素也鳴必兆凶而乍以吉往人安能遂信之無已則更鳴而可乎

蜩謂雀曰甚矣子之栖栖也而食官倉之粟啄野田之禾五尺童子臂機彈而隨之睥睨側行什發而中四五焉獨奈何以如丸之腹而自喪其軀乎知蜩謂鵲曰子非有求於食者也飽清風飲甘露

振子之文綏而逍遙於埃壚之表斯已矣而乃終日噫噫於柳葉之間使無賴爲娛者以子足圖也拈竿而累垸凝神而掇之十而中八九焉孰愈於栖栖以斲食者乎蠶又謂蜘蛛曰子之腹枵然大也利害宜知之而乃張如輪之網結比目之文而罾之於簷楹之間撼之則搖觸之則斷而承蜩者以爾爲具也乍成而倏毀併其身而撲之非作僞而心勞者耶蠹又謂蠶曰子知彼之無用而爲子之有用似矣然盈寸之軀所需幾何而乃偏者乎桑桑之葉秦養於婦人之手纖纖而累之宛轉而營

之而殺身以爲報即黼黻玄黃庸詎知其文乎海
燕聞而咲之曰雀之以食爲崇也蜩之以不食爲
崇也蜘蛛以無用之巧爲崇也蠶以有用之巧爲崇
也皆不知隱身以遠害者也不自病而病物益惑
矣蠹宅木之心而飽其脂膏自以爲太山之安而
不知實腐而幹傾也震風從而折之又將安所於
庇乎

廣廈闊屋連房通闌人之所安也鳥入之而憂西
施毛嬙閭娵曼姬人之所愛也魚見之而避咸池
承雲九韶六英人之所樂也鳥獸聞之而驚縞衣

羅繻冠冕佩玉人之所華也獼猴服之而駭高山
險阻深林叢薄虎豹之所樂也人入之而畏洪濤
大壑積水重泉龜鼃之所便也人入之而死惡草
瘴波妖雲毒霧龍蛇之所宮也人觸之而斃迴谿
峭岸峻木尋枝援穴之所樂也人上之而慄彼以
爲樂而此以爲憂也彼以爲危而此以爲安也於
乎非聖人孰能盡人物之性乎

馬以致遠牛以負重鷄以司夜狗以守門因其性
也埏埴以爲器窰木以爲舟鑄金以爲鍾鐃鐵以
爲刃因其質也陸處而耕水處而漁山處而樵谷

處而牧因其地也水之用舟沙之用鳩泥之用輶山之用藁因其勢也

歐冶風胡干將莫邪所操各異其于善劍一也伯樂韓風秦牙管青所相各異其于知馬一也汲水救火或以瓶盎或以盆盂或以斗杓或以甕甔盛水各異其於滅火一也伐木取材或爲輪輿或爲梁柱或爲柁舟或爲什器所用萬方其於適用一也

軸不運而三十輻各以其力旋以不動而用動也瑟不鳴而二十五絃各以其類應以無聲而使有

聲也張琴者小絃急而大絃緩賤者勞而貴者逸也作樂者黃鍾䟽而衆音繁卑者疾而尊者舒也定制者徇禮而不徇情故弁冕袞裳可服而不可好也太羹之和可食而不可嗜也朱絃䟽越一唱三嘆可聽而不可快也致用者貴實而不貴名故服劍者期於銛利而不期於昆吳太阿乘馬者期於千里而不期於黃戎盜驪鼓琴者期於鳴廉將營而不期於濫脅號鍾

城峭必崩岸峭必陀丘阜不能生雲雨涔水不能生魚鰲故蓬谷長林非爲虎豹也而虎豹棲焉叢

木茂枝非爲飛鳥也而飛鳥集焉大江淵海非爲蛟龍也而蛟龍藏焉

良馬啗粟一石飲泉一斛非潔清即不受介而馳初不甚疾也行百里而始奮迅行五百里而不起塵褫鞍甲而不息不汗若無事然此其受大而不苟取力裕而不求逞致遠之材也君子以之下焉者日食不過數升而秣不擇粟飲不擇泉攬轡未安踴躍疾驅百里力竭汗喘欲斃此其寡取而易盈好逞而易窮騶駘之才也小人以之

堂谿公謂韓昭侯曰今有千金之玉卮通而無

可以盛水乎昭侯曰不可有瓦器而不漏可以盛
酒乎昭侯曰可對曰夫瓦器至賤也不漏可以盛
酒千金之玉卮至貴也而無當不可以盛水則人
孰注漿哉今爲人主而漏其群臣之語是猶無當
之玉卮也雖有聖賢莫盡其術矣石濱子曰堂谿
公之言蓋專以諷昭侯也究而極之細人而忠信
其不漏之瓦器乎高貴而詐譖其無當之玉卮乎

陽虎去齊走趙簡主問曰吾聞子善樹人虎曰臣
居魯樹三人皆爲令尹及虎抵罪於魯皆搜索於
虎也臣居齊薦三人一人得近王一人爲縣令一

人爲候吏及臣得罪近工者不見臣縣令者迎臣
執縛候吏者追臣至境上不及而止虎不善樹人
主俛而笑曰夫樹橘柚者食之則甘嗅之則香樹
枳棘者成而刺人故君子慎所樹石漬子曰君子
之進君子非以植黨也而卒至於相濟志乎公也
小人之引小人本以樹援也而卒至於相讎志乎
私也是故善樹者以國不善樹者以身

管仲隰朋從於桓公而伐孤竹春往冬返迷惑失
道管仲曰老馬之智可用也乃放老馬而隨之遂
得道行山中無水隰朋曰蟻冬居山之陽夏居山

之陰蟻壤一寸而仍有水乃掘地得水以管仲之
聖而隰朋之智至其所不知不難師於若馬與蟻
今人不知以其愚心而師聖人之智不亦過乎石
濱子曰耳目心志聖人與愚人一也一爲聖而一
爲愚一善師而一不善師也是故神農之治病也
師於草禹之治水也師於水后稷之樹藝也師於
苗太公之制陣也師於鳥獸法天下而傳後世豈
自用其智而能之乎彼管仲隰朋知其細而不知
其大則是霸而已矣

夢國外集卷之十六

說林十六

記述林

一書而可以終身行之者其易乎自天子以至於庶人一也故曰以言乎遠則不禦以言乎邇則靜而正以言乎天地之間則備矣

易者象也象也者像也豕者材也爻也者效天下之動者也豕之材即易之象也爻之效即豕之材也始終本末一以貫之矣如需之言須也而六爻之中須得其地與時則吉不得其地與時則凶此

之言親也而六爻之中比得其人則吉比之匪人則凶豫一也而六爻之中當豫而豫則吉不當豫而豫則凶頤一也而六爻之中養得其正則吉養失其正則凶咸一也而得感應之常則吉失感應之常則凶遯一也而遯以其時則吉遯失其時則凶漸一也而進得其所則吉進失其所則凶艮一也而止其所止則吉止非所止則凶推之六十四卦莫不皆然執是以求之則易之大義其庶幾乎

伏羲之易至文王周公而始明文王周公之易至孔子而大著闡造化之秘極人事之變類萬物之

情於繫辭乎盡之矣此所謂考諸三王而不繆建
諸天地而不悖質諸鬼神而無疑百世以俟聖人
而不惑者也而歐陽子乃以繫辭爲非聖人之書
吾不知其何說也

十翼孔子之所以解經者也故學易者求之十翼
而已矣其有未備者推類以通之而已矣如頤之
彖曰頤貞吉養正則吉也燕養人與自養言之也
觀頤觀其所養也言養人之貴正也自求口實觀
其自養也言自養之貴正也先養人而後自養者
頤以養人爲義也然自養其本也故曰自求云耳

今本義以觀頤爲所養之道自求口實爲所以養身之術而大象曰君子以慎言語節飲食遂析而爲養德養身之事殊不知養德養身其實一也皆所以自養也析而二之非經文之旨矣故學易者亦先求之十翼而已矣

讀二典三謨則知禹之治不如堯舜之化矣讀湯誓泰誓則知武王之伐不如湯之放矣五子之歌其夏德之衰乎盤庚其殷道之衰乎呂刑其周道之衰乎

以又言之唐虞三代其以世而降耶蓋典謨之文

明白易知夏猶承之至盤庚而始晦至周而大晦
矣以治言之唐虞三代亦以世而降耶蓋堯舜之
治專務德化禹猶繼之至商而禁興至周而禁密
矣

詩小序不知何人所作然源流之所自蓋遠矣但
傳授不能皆真而詞旨時或小舛子朱子見其然
也而率以義理駁正之雖疏釋詳明而戾于本旨
者亦多矣是何也傳舊者事多真而久或訛失者
十而一二矣億斷者理雖精而事則否得者十而
一二矣如執此而廢彼豈爲善學者哉

小序曰栢舟言仁而不遇也衛頃公之時仁人不
遇小人在側而朱子以爲婦人之詩極詆小序之
失今觀其詩有曰敖遊曰威儀曰奮飛此豈婦人
之所以自咏者耶詳其詞旨其爲仁人不遇於君
而怨小人之見擯蓋宛然可見也傳者且不可據
而不傳者又何以爲信乎

邶鄘衛鄭之風朱子率以淫詩斷之其言曰夫子
放鄭聲而正雅樂雅者二雅是也鄭者緇衣以下
二十一篇是也衛者邶鄘衛三十九篇是也桑間
衛桑中之詩是也故凡考証未審詞旨可疑者禁

謂之淫風竊意夫子所惡於鄭衛之聲者蓋民間
流傳之音而非刪定之詩也如其槩任所擯也則
如定之方中瞻彼淇澳與緇衣羔裘之篇竝以爲
淫風而棄之乎必不然矣而乃悉目之於二十一
篇三十九篇之中不已過乎今考小序曰桑中刺
奔也氓有狐刺時也於詩意固無舛也於蝥螋則
曰衛文公能以道化其民淫奔之恥國人不齒也
今未有以見其不然而直謂刺淫奔之詩何與於
木瓜則曰美齊桓公封衛之功而衛人欲厚報之
蓋其意誠無窮也而或乃以衛未嘗有瓊瑤之報

爲疑亦以爲男女相贈答之詞又何與於風雨則
曰思君子也夫世亂而思君子宜無所不至故曰
賢賢易色安得以詞之狎昵爲疑乎於子衿則曰
刺學校廢也夫學校廢而思多士亦宜無所不至
故曰得天下英才而教育之三樂也安得以爲詞
意儼薄而不類乎夫史之闕文夫子所慎而傳信
傳疑經生之準豈古昔之所傳者皆非而盡以義
理億斷者爲是乎故吾之於詩傳也有信有不信
也

伐檀刺貪也在位貪鄙無功而受祿君子不得

任爾今考其詞伐檀爲車而寘之河干正言君子
被擯而不得仕也不藝而得禾不獵而得獸正言
小人無功而受祿也未言君子之不素飡正以深
刺小人之素飡也今如集傳之意則文義自不能
通而詩人之旨晦矣

南山有臺樂得賢也得賢則能爲邦家立太平之
基矣故其詞曰邦家之基曰邦家之光曰民之父
母蓋深慶之也菁菁者義樂育材也君子能長育
人材則天下喜樂之矣故其詞曰菁菁者義喻人
材之盛也曰我心則喜曰我心則休深以爲慰也

亦非槩爲燕饗之詩也

胡文定春秋傳爲宋高宗而作也故其義一以尊君卑臣內夏外夷爲主其有不能通者亦強而合之曰美惡不嫌同詞曰書之重詞之復其中必有大美惡存焉蓋至是而聖人之意鑒矣然詞嚴而義正事核而氣充宋之文吾必以是爲首選乎

莊二十有九年紀叔姬卒文定以爲病紀侯非也紀亡矣侯既卒矣又何病乎說者曰叔姬不爲國亡變其所守而待盡于鄫春秋特錄之以勸後世是也以此坊民猶有儷體宸居國亡不能死而委

身於夷狄如晉惠后之為者

孔子曰吾志在春秋孟子曰春秋天子之事孔子作春秋而亂臣賊子懼蓋方是時王綱鮮紐篡奪相尋孔子不得其位以行其道於是因史記而修春秋隨事直書亂臣賊子無所逃其罪而一王之法以明所謂撥亂世而反之正者也自褒貶凡例之說興讀春秋者徃徃穿鑿聖經以求合其所謂凡例又變移凡例以遷就其所謂褒貶如國各有稱號書之所以別也今必曰以其事也故國以罪之及有不合則又遁其詞人必有姓氏書之所以

別也今必曰以某事也故名以誅之及有不合則又遁其詞事必有月日至必有地此記事之常否則闕文也今必曰以某事也故致以危之故不月以外之故不日以畧之及有不合則又遁其詞是則不以義理求聖經而反以聖經釋凡例也聖人豈先有凡例而後作經乎何乃一一以經而求合凡例耶其以正次王王次春者以天子上承天道下統諸夏也弑君弑父者書殺世子殺大夫者書以其邑叛以其邑來奔者書名實昭章皆天子之事而天之為也今必謂其陰寓褒貶使人測度而知如

優戲之說隱已為不可況又於褒貶生凡例耶以例求春秋皆逆詐億不信之心而謂聖人為之乎春秋之法誅亂臣討賊子內中國外夷狄貴王賤霸而已直書其事而善惡是非欲掩而不可掩斯之謂實錄也如曰加某字以貶人又削某字以貶人加某字以褒人又削某字以褒人則聖人之作經幾於舞文弄法之為矣且七十子之徒親炙門墻尚不知聖人之意者若正名之言子路猶有惑焉今乃欲以不明之意示千百世之人而使人各以所見求之豈光明正大垂訓於人人者乎

稱人者貶也而人不必要皆貶微者亦稱人稱爵者
褒也而爵不必皆褒譏者亦稱爵繼故不書即位
而桓宣則書即位妾母不稱夫人而成風則稱夫
人失地之君名而衛侯奔楚則不名不踰年之君
稱子而鄭伯伐許則不稱子會盟先主會者而平
屋之盟則先宋征伐首主兵者而羸之師則後齊
母弟一也而或稱之或沒之天王一也而或稱之
或去之此皆凡例之不可通者也惟求其行事之
實則其得其失思過平矣

春秋之世其始也王室微而諸侯強故抑諸侯以

尊王室其繼也諸侯又從而夷狄強則又抑夷狄而扶諸侯尊王室固所以尊王也扶諸侯亦所以尊王也

春秋之書有因魯史之舊文者有聖人之特筆者如計告則書不計告則不書曰鄭公曰夏五及其他會盟戰伐皆因魯史之舊文也如曰成宋亂曰齊侯衛侯胥命于蒲曰夫人孫于齊曰夫人孫于邾曰鄭棄其師曰天王出居于鄭曰天王狩於河陽曰四卜郊不從乃免牲猶三望曰閏月不告月猶朝于廟此聖人之特筆也

或曰桓公宣公皆書有年紀異也何言乎異也大
倫既歿咎徵豐見國無以為國矣而乃得有年非
所有而有之者也君不恤民而天恤之國不宜瑞
而天瑞之則是異而已矣子曰不然桓之世日食
既則書大水則書無冰則書宣之世螽則書大旱
則書日食既則書如以有年為紀異也則將以此
數者為紀常乎春秋於無道之國豈專欲其凶災
而不欲其豐足也各書其實而休徵咎徵有不容
隱者矣

隱公攝位成先志也隱非庶孽桓非正嫡志乎立

桓者惠公之私也。隱長而賢，桓愛而幼，隱不立則無以定國立，則非惠公之意，故攝也。天王致賵，考宮獻羽，皆所以尊仲子也。尊仲子所以成桓公之為君也。却羽父之請而為莧裘之營，公之歸國有日矣，而何桓公之不能忍也？篡逆之臣惟利是視，羽父不足誅矣。以怨報德，以讒動逆，桓之罪可少逭乎？胡氏以隱為猶豫，宜及於禍，是責人無已之論也。

桓無王而元年書王，正月以天道王，法正桓公之罪也。桓無王而二年書王，正月以天道王，法正宋

督之罪也胡氏之言然乎曰非也衰世無天道而天道未嘗亡衰世無王法而王法未嘗亡其或書王或不書王因史氏之舊文也篡弑之賊不待貶黜而惡自見矣若曰書天道以討其書王法以討其是後世獄吏之為也而謂聖人為之乎如不以討罪之故也則曰王曰正可以廢而不書乎鑿說亂經此其為謬亦甚矣

歸賄歸祿來聘錫命求車求賻逆后歸姬天王之所以交於諸侯者此耳其餘不得而與也是故會盟數而列國之私交盛矣朝覲廢而尊王之典禮

捐矣戰爭繁而征伐不出於天子矣慶弔頻而禮樂不出於天子矣賜爵賜祿賜氏賜族一切擅而行之天王之分其與存者能幾何哉春秋之作其以著王室之陵夷乎其聖人之不得已乎

文公四年晉侯伐秦胡氏謂聖人以常情待晉襄而以王事責秦穆故晉侯稱爵二年秦晉戰于彭衙胡氏又謂以晉侯為主處已息爭之道遠怨之方王者之事也則又以王事責晉襄矣前後矛盾此類甚多欲以明聖人作經之意不亦難乎

桓公會齊侯于濊公與夫人姜氏遂如齊非所如

而如焉者也公薨于齊非所薨而薨焉者也公之
喪至自齊非所至而至焉者也葬我君桓公非所
葬而葬焉者也天王之失政隣國之失討魯之無
臣子胥見之矣

周衰失政諸侯有弑逆者非惟不能討而又聘焉
春秋書王臣下聘者八而聘桓公者凡三桓之罪
尤著而周之聘尤亟此周之所以不振也

鄭伯不朝天子率諸侯親征從之者三弱國而已
又畏齊之比於鄭也不能躬擐甲胄而以微者行
其曰蔡人衛人陳人從王伐鄭傷之也戰于緡葛

而不書戰王卒大敗而不書敗所以存天下之
也

初與鄭入許者齊魯也以許與鄭者亦齊魯也既
而謀定許者又齊魯也魯本與突許實怨鄭定許
所以撓忽也撓忽所以翼突也方突之未出也宋
有所責而伐之突之既出也宋懼無所得而又欲
納之魯既以鄭伐宋既又與宋伐鄭或合或讎反
覆皆私也故曰春秋無義戰

或譏魯莊公不能復父之讎或譏公不能防閑其
母夫子而制母事之難為也以弱讎強力有所不

足也是猶可說也惟夫以昏姻之故一年之間親如齊者再盟齊者一遇齊者一何若是之僣僣乎納幣逆女皆以身親之矣比其至也又使大夫宗婦用幣以覲違禮越制以為媚悅無所不至曾不念文姜者何國之女乎桓公之弑也以何地何人乎忘不共戴天之讎而甘心於伉儷之好有人心者忍為之哉卒之哀姜通于慶父叔牙公沒而謀篡二世殲焉雖賴季友柄國社稷再安而季友之後為季孫叔牙之後為叔孫慶父之後為孟孫三桓擅政祿去公室而魯不復振則莊公為之也

史氏之言曰齊桓公與蔡女戲舡中夫人蕩舟桓公止之不止公怒歸蔡女而不絕也蔡侯怒嫁其弟桓公怒而伐蔡以事揆之此殆不然自莊公十四年荆入蔡蔡哀侯折而事楚易世不通中國者二十有四年矣蔡已入楚則次及于鄭蔡鄭者楚道之衝而華夷之門戶也攘夷尊周桓公方有事焉不得鄭無以攻蔡不得蔡無以及楚蔡得而楚之四封震矣故包茅一問而楚詞遂屈兵不血刃而方張之國懾如鳥鼠使諸侯不復携貳而中國不淪於左衽者皆邢之師為之也其云怒蔡蓋因

史之誤耳如徒以一婦人之故而興師則諸侯何
遽合從而強楚何遽屈服乎桓公圖霸必不若是
之拙也

周惠王愛其子叔帶將易其世子鄭故齊侯合八
國之君會于首止以定王世子惠王不悅使周公
謂鄭伯曰吾撫汝以從楚輔之以晉可以少安鄭
伯聽之逃歸不盟說者謂首止之盟齊侯從義不
從令也逃歸鄭伯從令不從義也桓公合諸侯二
十餘年僅能服楚於召陵鄭伯一逃楚即滅弦若
鄭文者不特桓公之罪人實天下之罪人也及諸

侯合兵以討洮之會鄭乃乞盟春秋於其叛書也
於其來書乞賤之也

僖十有四年季姬及鄆子遇於防使鄆子來朝趙
氏曰季姬不繫於國內女之未嫁者也蓋期鄆子
于防而鄆子遇之也使鄆子來朝以請昏于已故
明年而季姬歸于鄆如其意也始遇于防而公不
制中使鄆子來而公不耻終歸于鄆而公不止鳴
呼淫風流行桑中大車之詩不作於魯而駟與有
駟之篇猶以頌僖何哉蓋夫子於魯詩存頌而略
風為魯諱也春秋天下之大法豈容盡諱哉文美

哀姜鄆季姬之事備著於經雖無魯風可也

世之稱五霸果若是班乎曰不同也霸也者攘夷
狄安中國以尊周室者也故齊桓未興天下大亂
齊桓興而天下定矣齊桓既没天下又亂晉文興
而天下定矣此二君者生民倚之以為命周之宗
社賴以不滅此所謂霸也若宋襄之狂繆戡中國
以事夷狄秦穆楚莊以夷狄而脅中國此桓文之
所必討者惡得謂之霸哉故孔子於春秋言其事
則齊桓晉文其義則其竊取之孟子云仲尼之門
無道桓文之事者蓋力勉時君以行王道救時之

言也後之讀春秋者不是察也而槩以桓文之功為聖門之所不齒豈其然哉

魯之衰也以三家三家之強則文公成之也方其即位之初隣國之好不親霸主之會不親率以大夫往焉閏月不告月當月不視朝昏庸偷惰足不出寢門之外是以大夫竊柄互結私援外事大國內懷國人以自封殖威權日去而猶不之悟也故如陳如晉帥師城邑者季孫行父也會晉伐沈敗狄于鹹者叔孫得臣也為戚之會為垂隴之盟者公孫敖也至東門襄仲則見於經者凡九或會或

盟或如或伐其專恣益甚於三家矣泰阿倒持是
尚可以為國乎卒之目未瞑也而二子為戮妃妾
不能相保亦何貴於為人君哉

成公之時國無可為矣強臣擅命而政令無章故
作丘甲非所作而作也立武宮非所立而立也取
鄆非所取而取也用郊非所用而用也以季孫行
父之私怨歸父也而合七大夫之師以伐齊以楚
之強暴也而合十一國以與楚盟是尚可以為國
乎故弔景公之喪而輒見止如沙隨之會而不得
見已則不競又何尤於人乎

公以幼冲即位三桓之強如火益灼不復可以
繼邇至季武子乃作三軍以分公室而千乘之尊
徒藐然寄空名耳始也賴晉悼以守封疆繼也籍
晉平以延喘息及晉與楚平而楚之暴橫益甚公
也兩事晉楚疲於奔命見辱於楚得脫以歸不自
創也而反効夷言作楚宮以沒是尚謂之有耻者
乎

昭公之時國非魯君之國矣以英主為之猶懼其
不競也況於生十有九年而猶有童心者乎故如
齊求納而不與如晉求納而不與蓋齊之高國晉

之六卿猶夫三家也以勢則政不在公而在三家以利則公無賂而三家有賂公可失而三家不可失也是以孫于齊次于陽州居于鄆次于乾侯累累若喪家之狗而誰收卹之及不勝其憤而攻季氏乃又不能克也卒之齊晉皆莫之救而客死於乾侯不亦悲乎定公當昭公失國之後親征伐親會盟用孔子以相夾谷用子路以墮三都三桓亦稍戢矣公薨而哀公立三桓復橫所謂天之所廢不可復興者也

周自平王東遷政在諸侯至隱之世習以成俗齊

桓晉文相繼而起秉大義以尊周室而會盟征伐迭見於天下故夫子作春秋以繩之定哀以來齊晉既衰政在大夫吳越橫行天下靡然日入於戰國而西狩獲麟適當其時聖人亦無如之何矣故春秋以是終焉是春秋之作始於五伯終於戰國天之所以拯亂世也

禮記雜出於漢儒而禮經淆矣 國朝以禮記列於學官用之取士而禮經亡矣昔子朱子慨禮經之淆也而為儀禮經傳以儀禮為經而取禮記與他書言禮者為傳其於古禮蓋庶幾焉惜乎未成

而卒而終之於門人之手遂使後人不尊而遺經不復豈非斯文之不幸哉近若湛甘泉之二禮測亦可以相發明矣

虞氏曰禮記乃儀禮之傳儀禮有冠昏鄉飲燕聘禮禮記有冠昏鄉飲燕聘義以釋之蓋儀禮周公所作而禮記則漢儒所錄亦儀禮之流也何以言之儀禮漢初已行故高堂生傳之蕭奮蕭奮傳之孟卿孟卿傳之后蒼后蒼傳之戴聖二戴因習儀禮而錄禮記故知儀禮之流也

列子楊朱之篇蓋欲齊生死混賢愚等貴賤淆毀

譽而一之此荒唐之旨也以堯舜為偽讓而享祚
以夷齊為實讓而失國以舜禹周孔為苦死以夏
桀殷紂為樂終以子產為鄙以胡穆為真以節性
為累牯以縱欲為自然以速亡愈於久生以賢愚
同為腐骨率是道也是使人廢君臣父子夫婦長
幼之倫窮聲色臭味男女之欲孜孜如不及禽獸
之行興而禮義之坊決矣夫惟天生民有欲無主
乃亂故為之法以治之為之教以導之尤懼其或
懈也而且以生前之善惡為死後之勸懲無非所
以閑其邪心而止其謠辟焉耳豈聖人之得已哉

如其以肆情為達生以拘錄為闕性而惟患死之不速也則必越樊毀垣侵攘欺紿無所不至以求厭其欲是率天下而亂矣即欲為朝穆也其可得乎於乎此邪說誣民罪不容於僂矣

莊子盜跖漁父之篇醜詆孔子此自知其德之不能跂孔子也駢拇肱篴之篇力排聖人此自知其功之不能希聖人也觀其一書之中諄諄稱引不一而足蓋可知矣不特此也極言死之為樂則知其畏死也甚於恒情矣極言貧賤之為適則知其厭貧賤也甚於恒情矣於乎若周者其真欺世之

賦以騷爲至晉董猶爲近之若三都賦吾無取焉
詩以漢魏爲準晉猶爲近之若三謝詩吾無取焉
揚子雲以太玄擬易而不知方州部家之起例非
八卦之變化也其果足以明天人之蘊乎文中子
以中說擬論語而不知董薛裴賈之問答非孔門
之授受也其果足以承先聖之統乎然則覆瓿之
譏續經之僭宜有不能免者矣

古詩若陶淵明六朝之冠也陳子昂初唐之冠也
李太白盛唐之冠也然較之於漢魏則相去遠矣

蓋漢魏之詩典而厚三子之詩薄而流漢魏之詩
婉而約三子之詩直而肆漢魏之詩比興無涯而
三子之詩情神畢露其可比而同之乎求其庶幾
者其阮嗣宗陸士衡乎若左思之咏史郭璞之遊
仙又其次也

晉之文以二陸爲至然雲非機比矣唐之文以韓
柳爲至然柳非韓比矣初唐之詩以燕許爲宗然
張非蘇比矣盛唐之詩以李杜爲冠然杜非李比
矣學者當自得之

言文者必稱韓而不知文之衰自韓始也言詩者

必稱杜而不知詩之來自杜始也是何也古人之
爲文也吐詞爲經出言成章意不屬而自屬言不
文而自文亦猶日月星辰之麗天也亦猶山川草
木之麗地也至昌黎則造意續詞安排布置殆如
匠者之構居室矣古人之爲詩也風雅頌以經之
賦比興以緯之以道性情之真以達風諭之旨如
風之動物也如水之行地也至少陵則誇多眩奇
羅網堆積殆如庖人之充俎豆矣後之法韓者不
學其變化而專學其鍛鍊法杜者不學其宏博而
專學其艱澁夫安得不弊乎

莊子襲列子而爲之者也呂氏春秋襲莊列左氏
管子而爲之者也淮南子襲莊列文子韓非子呂
氏春秋而爲之者也

董仲舒曰皇皇求仁義惟恐不及者士君子之志
也皇皇求財利惟恐不給者庶人之見也又曰積
善在身猶長日加益而人不知也積惡在身猶火
銷膏而人不見也故皇皇於爲善則可以得長日
之益矣皇皇於去惡則可以免銷膏之患矣

伯牙鼓琴六馬仰秣瓠巴鼓琴游魚出聽誠乎琴
也養由基射矢中石矢乃飲羽誠乎射也伯樂相

馬所見無非馬誠乎馬也庖丁解牛所見無金牛
誠乎牛也夫誠乎技者而猶若是而況誠於道者
乎

古語曰以百金與搏黍以示兒子兒子必取搏黍
矣以和氏之璧與百金以示鄙人鄙人必取百金
矣以和氏之璧道德之至言以示賢者賢者必取
至言矣其知彌精其所取彌精其知彌拙其所取
彌拙

上馬者安義其次畏義其次畏法下是則刑戮之
民也

毀譽其衰世之風耶哲人莊十之所不屑也然而
善善貴長譽之過也猶之爲厚也惡惡貴短毀之
過也薄斯甚矣此待人之道也聞譽而自驕則德
日以損庸可喜乎聞毀而自省則善日以興庸可
怨乎此修己之道也故君子與其毀人也寧其譽
人也與其譽己也寧其毀己也

先儒有言學者所以學處貧賤患難也若富貴利
達則不須學也惟聖人則異是矣是故文王演易
於羗里忘其爲羗里也孔子絃歌於陳蔡忘其爲
陳蔡也此不學而能者也顏子簞瓢陋巷而不改

其樂原憲衣敝屨穿而不困於病夏侯勝坐徒舁而授尚書陸德輿謫忠州而作集驗范忠宣竄永州而體貌益康程伊川貶涪州而容髮轉勝蘇文忠謫惠州而濟施不倦張無垢謫南安而誦讀不輟此皆學而能之者也然則富貴利達果可以不學乎曰此自處困言之也其致則一也如弗學則誣上行私亂政虐下將何所不至矣

人有以耳視者亦有以耳食者有以目行者亦有以目食者衣服未必稱於體也珍寶未必辨於目也聞人之所美而美之此謂以耳視也膏粱未必

充於腹也調和未必適於口也聞人之所美而美之此謂以耳食也山川未之歷也宮室未之游也圖史之所稱而亦稱之此謂以目行也果餌之刻鏤無益於味也膳羞之朱綠無當於口也時俗之所珍而亦珍之此謂以目食也雖然此猶以形欲論也乃於道德仁義亦無不然不亦可哀之甚哉張無垢曰用明於內者見己之過用明於外者見人之過見己之過者視天下皆勝己也見人之過者視天下皆不如己也此智愚所以分與石瀆子曰視天下而皆勝己也則其爲善也不得不力矣

欲無智得乎視天下而皆不如已也則其爲善也不能不怠矣欲無愚得乎

揚文定公曰士君子一言一行無愧幽明然後無負於父母生身之恩又曰人必有躬行之實然後可以訓子孫故不敬其身而能孝其親者未之有也不修其身而能裕其後者亦未之有也

修爲之功其於接賓承祭也不待勉強也而施之於妻子則忽矣操存之念其於應事接物也不易察識也而形之於夢寐則真矣故曰夜卜諸夢寐晝觀諸妻子蓋妻子旣刑則修爲無所不至矣夢

寐既良則操存無所不至矣

書即我也讀書所以求盡已也教以直內義以方外邇之事父遠之事君中盡人之性下盡物之性皆書之所具也亦我之所具也故讀書所以求盡已也故曰萬物皆備於我矣反身而誠樂莫大焉強恕而行求仁莫近焉此盡已之謂也舍是而爲學吾弗知之矣

學藝則學學道則學其從事一也學道者求爲聖賢學藝者求成一藝其大小懸殊也然學藝者必以藝學積久而藝成矣學道者多以口學曠日而

無得矣於乎可以學而不如藝乎

爲學者其猶墾田乎墾得一畦即治一畦播之耘之以求一畦之獲也墾得一畝即治一畝播之耘之以求一畝之獲也已墾者藝而不荒未墾者拓而不已如此則德日益崇業日益廣其於學也其殆庶幾乎

人知高高者爲天而不知地上皆天也知冥冥者爲鬼神而不知幽顯皆鬼神也知物我之爲物我而不知物之莫非我也如知地上之皆天也則無所不用其敬矣知幽顯之皆鬼神也則無所不用

其畏矣知物之莫非我也則無所不用其公矣
君子之於道德也無時而自足也其於利祿也無
時而不自足也夫惟無時而自足也故道德無不
足也夫惟無時而不自足也故利祿亦無不足也
鏡之明已也功細士之明已也功大舟之濟物也
惠微德之濟物也惠溥然人皆欲鏡之明已也而
惡士之明已也皆知舟之濟物也而忘德之濟物
也

道德之學非以徼福也而福生焉術數之學非以
賈禍也而禍生焉蓋幽贊神明易數也天人類應

春秋教也而世儒假設經誼依托象類附會陰陽
之數漏洩鬼神之機膠泥福應刺譏當道之弊
疾欲免難矣故董仲舒賢矣而下吏夏侯勝正矣
而囚執眭弘伏誅於都市李尋流放於敦煌京房
被刑於石顯郭舉見戮於王敦此其章章著者也
他如費長房劉靈助之流益卑瑣不足道矣是以
君子羞稱焉

毀我者我以無毀勝之毀亦不甚害我者我以無
害勝之害亦不甚可怒之事以不怒勝之怒亦自
止可競之地以不競勝之競亦自消